

HO TLA SENNGWA DISAKARETE TSE SENG MOLAONG TSA BOLENG BA R18 MILLION

Cape Town, 8 Mmesa 2021 – Mafapha a fapaneng a mmuso a lwantshanang le thomelohare le thomelontle e seng molaong a tla senya disakarete tse seng molaong tse 12 million tsa boleng ba R18 million mane Cape Town ka Labohlano la 9 Mmesa 2021.

Ho senngwa hona ho tla qala ka 8 hoseng mane State Warehouse, e leng mane no.9 FW de Klerk Boulevard, Cape Town Foreshore.

Disakarete tsena di tla silelwa hona moo ka lebaka la melawana e teng ya tsa bophelo bo botle le tshireletseho. Masalla a tsona a tla nkelwa diterakeng tse ikgethang ka tshebediso ya lebanta la tshebetso mme tsena di lahlelwe thotobolong e sireletsehileng tlasa leihlo le ntjhontjho.

Disakarete tsena tse seng molaong di hapilwe matsholong a fapaneng, ho akareditswe le kgapo ya khonteina ya bohobo ba maoto a 40 e neng e mokotswe ho kena ka naha mme ya tsebahatswa ka leshano la hore ke dithoto tsa mofuta o mong.

Mehato ena e matla e kgahlano le thomelohare le thomelontle e seng molaong ke eo mmuso o tsepamisitseng maikutlo ho yona tlasa *Inter-Agency Working Group* (IAWG) e shebaneng le Kgwebisano e seng molaong, mme sehlopha sena se akareditse mafapha le diakgente tse ngata tsa mmuso.

IAWG e tsepamisitse maikutlo hodima diaparo tse seng molaong, masela, dieta, matlalo, meralo ya motheo ya ditshebeletso e rekiswang jwalo ka dikerepe mmoho le dikoloi tse kileng tsa sebediswa pejana.

Ho senngwa ha dithoto tsena tse seng molaong ho tla romela molaetsa o matla hore mmuso o keke wa mamella kgwebisano e seng molaong hohang mme sena se tla boela se lemosa setjhaba ka kotsi eo dithoto tsena di e bakelang ikonomi ya rona mmoho le bophelo bo botle ba batho ba rona.

Diketso tsena tse seng molaong di nonyetsa bokgoni ba naha ba tlhahiso mme sena se lebisa ho hlokeheng ha mesebetsi, ho se lekane le bofuma. Dithomelohare le dithomelontle tsena tse seng molaong ebile ke mohlodi o moholo wa tjelete bakeng sa maqulwana a dinokwane.

Ntwa ena e kgahlano le bosenyi bona ba dithomelohare le dithomelontle tse seng molaong ke ya bohlokwa haholo hobane sena se fokotsa bokaalo ba lekgetho le bokellwang ke SARS.

Lekgetho le bokellwang le kgatha tema ya bohlokwa ho kgontsha mmuso ho aha mmuso o nang le bokgoni o fanang ka ditshebeletso tsa motheo ho bahloki, ba kotsing ya ho utlwiswa bohloko le malapa a tjena, mmoho le ho thusa beng ba mesebetsi le basebetsi ka nako ena ya sewa sa Covid-19.